

Desetine mrtvih širom Sirije

11 februar 2012 Izmijenjeno 17:13 CET

Vlasti nastavljaju ubijati civile u Homsu i Hami, dok se opozicija tereti za smrt vojnika i vojnog ljekara



Slobodna sirijska vojska odbacila tvrdnje da je odgovorna za smrtonosni bombaški napad u Alepu [EPA]

Sirijske snage sigurnosti pojačale su napade na Homs i Hamu, dok su anti-vladine snage navodno odgovorne za smrt nekoliko vojnika u Idlibu i visokog vojnog zvaničnika u Damasku, izvijestili su aktivisti i državna novinska agencija.

U subotu je državna vojska tenkovima i raketama napala Homs, a naselje Bab Amr bilo je pod stalnom paljbom. Organizacije za zaštitu ljudskih prava saopćile su da je u subotu u ovom gradu ubijeno najmanje četvero ljudi, a da su također pronađena tijela troje ljudi koji su ranije izgubili živote.

Racije u naseljima

U posljednja dva dana, snage sigurnosti idu od kuće do kuće u Homsu, u potrazi za opozicionim borcima, izvijestili su anti-vladini aktivisti. Prema njihovim riječima, u ovom gradu je ubijeno 300 ljudi od četvrtog februara, kada je počeo posljednji napad na ovaj grad.

U Hami, Opća revolucionarna sirijska komisija (SRGC), udruženje za zaštitu ljudskih prava koje je organiziralo protest protiv vladavine predsjednika Bashara al-Assada, saopćila je da su brojni vojnici još uvijek prisutni u gradu. Kako je izvijestila ova organizacija, trupe su napravile raciju u naselju al-Sharia, te da su u tom i susjedna dva naselja uhapsili brojne ljude.

Iz gradova Zabadani i Douma, nedaleko od prijestolnice Damaska, također pristižu izvještaji o sukobima snaga sigurnosti i boraca opozicije.

Akcije odbjeglih vojnika

Prema navodima SRGC-a, 35 ljudi je ubijeno u subotnjem nasilju – 19 u Homsu, 10 u Deraa, četiri u okolini Damaska, te po jedna osoba u Hami i Idlibu.

Sirijski opservatorij za ljudska prava, sa sjedištem u Londonu, izvijestio je da je 10 vladinih vojnika ubijeno u zasjedi odbjeglih vojnika u Idlibu, nedaleko od granice s Turskom. Odbjegli vojnici napali su patrolu između dva sela koristeći ručne bombe, saopćio je Opservatorij. Odbjegli vojnici također su se borili protiv državnih trupa u noći s petka na subotu u naselju al-Qaboun u Damasku.

Kako je izvijestila državna agencija SANA, „oružana teroristička skupina“ je ubila generala Issu al-Khoulija, ljekara i upravnika bolnice u okrugu Rukneddine u Damasku. Međutim, anti-vladino Revolucionarno upravno vijeće, navelo je da vladine snage stoje iza ovog ubistva.

Sirijska opozicija ranije je demantirala je vladine navode da je odgovorna za bombaške napade u Alepu u petak u kojima je smrtno stradalo na desetine ljudi.

Sirijska državna televizija prenijela je tvrdnje ministarstva zdravstva da je 28 ljudi ubijeno, a 235 ranjeno, uključujući vojnike i civile.

Robert Ford, kojeg su Sjedinjene Američke Države ranije ove sedmice povukle sa mjesta ambasadora u Siriji zbog nasilja nad civilima u toj zemlji, na Facebooku je osudio nasilje u Homsu i drugim sirijskih gradovima. Ford je objavio satelitske slike Homsa koje je snimila američka vojska, a koje, prema njegovim riječima, pokazuju napad vojske na civile.

Izvori: Al Jazeera